

NAQQIUT

Siunnersuut 13. august 2025-meersoq taarserpaa
(Qulequtaa naqqiutigineqarpoq.)

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Namminersorlutik Oqartussat nalunaarutaata iluarsaanneqarnissaa pillugu illersuinermut timmiarniarnermullu¹ appanik² taateraani³ piniarsinnaanerup nalaani peqassuseq aalaakkaasumik nalilernerqarsimappat zoneni aalajangersimasuni ulluni 30-ni sivitsorneqarnissaa pillugu Naalakkersuisut kingusinnerpaamik UKA2026 sumiiffikkaartumik attuumassuteqartunut tusarniaaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Jens NapātôK', Naleraq)

Tunngavilersuutit:

Piffissanngorpoq timmiarniarnermut malittarisassat ullutsinnut pissutsinut nalimmassarneqarnissaat piniarneqarsinnaanerisalu sivitsorneqarnissaat. Tamanna kulturitsinnik arlalinnik pisariaqartitsinernik aallaaveqarpoq aamma nerisassaqaarniarnermi imminut annertunerusumik pilersornissamut kissaateqarnermiilluni.

Timmissat kalaallit kulturianut ileqquinullu annertuumik pingaarutilittut inissisimapput. Inooriaasiuvoq sulitapersersortuagassaq, pingaartumik ilaqutariit namminneerlutik pilersorsinnaanerup eqqarsaatigissagaanni. Piniarsinnaanerup sivitsorneqarnerani qulakkiissavarput pisarneq malillugu iluutsit kulturillu piginnarneqarlutik ingerlateqqinneqarnissaat.

Silaannaap allanngoriartornerata piniartut annertuumik eqqorsimavai. Immami sikusarneq annertuumik allanngoriarsimavoq, tamannalu pisarneq malillugu iluutsinut piniarfinni killiliisimalluni. Sumiiffippassuit siornatigut qimussimik imaluunniit umiatsiamik tikiqarsinnaasimasut maannakkut tikissallugit ajornarsisimapput. Piniakkanik ingerlatsinermi qulakkeerinninnissamilu eqqarsaqqinnissaq pisariaqalersimavoq, nunatsinnimi nunap inoqqaavinut inooriaatsitsinnut malittarisassat nalimmassartariaqalersimapput ILO-konventioninut naapertuuttunngorlugit.

¹ Selvstyrets bekendtgørelse om beskyttelse og fangst og fugle nr. 22 af 30. maj 2023

² Uria lomvia og Uria aalge

³ Rissa tridactyla



Piniarnissamut periarfissanik ammaassinerusariaqarpugut uumasut pissusissamisoortumik nerisaqaqatigiinnerat innarlernagu. Piniartut pisaminnik nalunaarsuinerat naalaartariaqarparput. Killilersuinerimmi sukangavallaartut pinngortitalerisunit naliliiffiqarsimasut kisiisa malikkunnaarniartigit, taakkumi ilaqutariippassuit inuuniarnerannut tatisisuummata. Tamanna naapertuilluarnerunngilaq naleqqutinngilluinnarlunilu. Politikikkut qanoq iliuuseqarnissamut sapiissuseqarnerusariaqarpugut oqimaaqatigiissitsilerlutalu killilersuinerit tulluurtumut utertinnerisigut.

Pisortanut aningaasatigut allaffissornikkullu kingunerisassai:

AC-fuldmægtig-i ukioq ataatsimut sulinerata nalinga kr. 500.000.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.